

**ANG****Bayan**Pahayagan ng Partido Komunista ng Pilipinas
Pinapatnubayan ng Marxismo-Leninismo-MaoismoTaon XLII Blg. 5
Marso 7, 2011
www.philippinerevolution.net*Editorial*

Patuloy ang pakikibaka para sa katarungan ng mga biktima ng diktadurang Marcos


Kulang na kulang at lubhang huli ang igina-wad na bayad-pinsala sa 7,526 na biktima ng pasistang diktadurang Marcos. Nitong Marso 1, sinimulang ibahagi sa kanila ang halagang \$7.5 milyon na katumbas ng mahigit ₱40,000 lamang bawat isa. Bagamat tinatanggap nila ang maliit na halaga bilang danyos, hindi pa rin sila lubos na nalulugod. Patuloy ang pagkauhaw nila para sa tunay na katarungan.

Hindi sila lubusang nasiyahan sa ginawang pagkatawan sa kanila ng abugadong si Robert Swift. Mahigit 2,000 sa orihinal na 9,539 na nagsampa ng kaso sa korte sa US noong 1988 ang inalisan sa listahan batay sa bagong itinakdang "rekisito" ni Swift. Marami sa kanila ang tumungo sa Maynila at nadismaya nang malamang sila ay tinanggal sa listahan.

Kalakhan ng mga biktima ng pasistang diktadura ay nagkakaedad na. Marami ang namatay na. Dalawampu't limang taon na ang nakalilipas mula nang maibagsak ang diktadurang Marcos. Noon pang 1992 nagtagumpay ang mga biktima sa isinampa nilang kaso sa Hawaii Federal District Court kung saan napatunayan na may sala ang rehimeng Marcos sa malalalang paglabag sa karapatang-tao. Malaking inhustisya ang labis-labis na pagkaantalang isakatuparan ang bayad-pinsala sa mga biktima at pagpa-

pabaya sa mga Marcos at kanilang kroni na patuloy na mamayagpag sa kapangyarihan.

Kulang na kulang ang kabuuang inareglong halagang \$7.5 milyon na piaghatian ng libu-libong biktima ni Marcos. Napakaliit nito kumpara sa tindi ng kalupitang dinanas nila sa ilalim ng pasistang rehimen. Pero higit dito, napakaliit nito bilang parusa sa pasistang diktador na nagkamal ng napakalaking yaman at nagpakasasa sa kapangyarihan. Kulang pa sa isang porsyento ito ng itinakdang \$1.97 bilyong bayad-pinsala ng korte sa US. Para sa mga Marcos at kanilang mga alipures, barya lamang ito na animo'y isinaboy nila para patahimikin ang patuloy na sigaw para sa katarungan.

***Mga tampok sa
isyung ito...*****Pagbubukas ng
usapang pangkapaya-
paan PAHINA 3****Mga aktibista ng KMP
at BM, pinaslang
PAHINA 6****Kaguluhan sa Libya,
sinasagpang ng US
PAHINA 11**

Patuloy ang sigaw para sa katarungan ng mga biktima ng pasistang diktadurang Marcos. Karamihan sa kanila ay mga manggagawa, magsasaka, estudyante, kababaihan, mga taong-simbahan at iba pang karaniwang mamamayang nanindigan laban sa pasistang rehimen at nakibaka para sa katarungang panlipunan at pambansang paglaya. Sila ang pangunahing biktima ng mga ekstrahudisyal na pamamaslang, pagdukot, tortyur, iligal na pang-aaresto at pagkulong at iba pang karumal-dumal na paglabag sa karapatang-tao.

Walang ipinakitang malasa-kit ang mga reaksyunaryong rehimen sa mga biktima ng diktadurang Marcos nitong nakaraang 25 taon.

Sa halip na kilalanin ang karampangan ng mga biktima na magbigyan ng karampatang bayad-pinsala, binakuran ng mga rehimen ito ang bilyun-bilyong dolyar na nakaw na yaman ng mga Marcos upang magamit sa pansariling kapakanan at masuhayan ang kanilang bangkaroteng paghahari. Hinarang nila ang mga panukalang batas na inihapag sa Kongreso para ipatupad ang desisyon ng korte sa US noong 1995.

Hindi lamang sinagkaan ng sunud-sunod na reaksyunaryong

rehimen ang pagbibigay ng danyos sa mga biktima, wala ring mapagpasyang hakbang naging naisagawa ang mga ito para igawad ang nara-rapat na parusa sa diktador, sa kanyang asawa, mga anak at galamay na kasapakat niya sa pandarambong at sa panunupil sa bayan. Sa loob ng 25 taon ay sistematikong inuk-ok ang katarungan at pinahintutang mamayagpag muli ang pamilya ng diktador. Ang kanilang mga tapat na alipures na nagpatupad ng batas militar ay nasa matataas na katungkulan ngayon sa reaksyunaryong estado.

Habang nagpahayag ng pag-suporta ang rehimen ng Aquino sa pagbibigay ng danyos sa mga biktima ng diktadurang Marcos, naghapag naman ng mosyon ang mga abugado nito para pigilin ang posibilidad na may makuha pang ibang danyos. Tulad ng mga sinundan nitong rehimen, patuloy pa ring tinututulan ng gubyernong Aquino ang mga pagsisikap ng mga biktima at mga abugado nila na makakuha ng karampatang bahagi ng mga natutuklasang yaman ng yumaong diktador.



Wala ring ginagawang hakbang ang rehimen ng Aquino para maparusahan ang mga Marcos at mga galamay nila para sa pandarambong at malalalang paglabag sa


karapatang-tao. Isang malaking kabalintunaan na sa ilalim ng rehimen ng Aquino ay pinapali-pad-hangin ngayon ang pakikipagkasundo sa mga Marcos at ang pagpapahintulot na mailibing ang mga labi ng yumaong diktador sa Libingan ng mga Bayani.

Pinatutunayan lamang ng kasaysayan ng bansa nitong nakaraang dalawa't kalahating dekada na ang tunay na katarungan ay hindi matatamo ng mamamayan sa ilalim ng reaksyunaryong estado. Walang kahit isa sa mga nagdaang rehimen ang nakapagparusa sa malalaking mandarambong at pasista na umapi at nagsamantala sa mamamayan. Hindi naparusahan sina Marcos, Ramos, Estrada, Arroyo at marami pang iba.

Sa kabila ng matatayog na salita ni Benigno Aquino III laban sa korapsyon, wala pa rin siyang ginagawang hakbang para parusahan ang malalaking magnanakaw ng nagdaang rehimen ni Gloria Arroyo. Wala pa rin siyang hakbanging nagpapakitang naiiba ang kanyang rehimen sa mga nagdaang rehimen sa usapin ng pagnanakaw, kalupitan at pang-aabuso sa kapangyarihan.

Hindi maaasahan ng mamamayan na parurusahan ng naghaharing uri ang kanilang kapwa mang-api, mandarambong at mapagsamantala. Nasa kamay ng mamamayan at kanilang militantang rebolusyonaryong pakikibaka ang pagkakamit ng tunay na katarungan.

AB

	
Taon XLII Blg. 5 Marso 7, 2011	
Ang <i>Ang Bayan</i> ay inilalabas sa wikang Pilipino, Bisaya, Iloko, Hiligaynon, Waray at Ingles.	
Maaari itong i-download mula sa Philippine Revolution Web Central na matatagpuan sa: www.philippinerevolution.net	
Tumatanggap ang <i>Ang Bayan</i> ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikau-unlad ng ating pahayagan. Maaabot kami sa pamamagitan ng email sa: angbayan@yahoo.com	
Ang <i>Ang Bayan</i> ay inilalathala dalawang beses bawat buwan ng Komite Sentral ng Partido Komunista ng Pilipinas	

Nilalaman	
Editorial: Patuloy ang pakikibaka para sa katarungan	1
Kawalang katarungan	3
Usapang pangkapayapaan	3
Daet 4, pinalaya na	4
Paglabag ng AFP sa tigil-putukan	5
Mga aktibista, pinaslang	6
Mga ambus ng BHB	7
Pagpupugay ka Ka Pyro	8
Treyning ng mga medik sa Samar	9
Pagtaas ng presyo ng langis	9
Pag-abandona sa mga OFW	10
Kaguluhan sa Libya	11
Balita	12

Pagbubukas ng pormal na usapang pangkapayapaan, nagtagumpay

Nasimulan at nagtapos ang pagbubukas ng pormal na usapang pangkapayapaan sa kabila ng pananabotahe ng mga ultra-pasistang elemento sa militar at pulisya. Matapos ang pitong araw na usapan, naglabas ng pinag-isang pahayag ang dalawang panig.

Muli nilang pinagtibay ang nagdaang mga kasunduan, kabilang ang The Hague Joint Declaration at lahat ng mga kasunduang pinirmahan ng Gubyerno ng Pilipinas (GPH) at ng NDFP hanggang Abril 2004.

Pinagkaisahan din ng dalawang panel ang saklaw at haba ng buong usapan. Alinsunod dito, itinakdang tapusin at pirma-

han ng magkabilang panig ang Comprehensive Agreement on Social and Economic Reforms (CASER) sa Setyembre 2011; ang Comprehensive Agreement on Political and Constitutional Reforms (CAPCR) sa Pebrero 2012; at ang Comprehensive Agreement on End of Hostilities and Disposition of Forces (CAEHED) sa Hunyo 2012.

Kaugnay ng CASER, magkakaroon ng tatlong magkakahiwalay na pagpupulong mula Hunyo hanggang Agosto nitong taon. Papasadahan ng dalawang grupo ang nasimulang trabaho na nabalam mula pa noong 2001.

Samantala, bubuuin na ng dalawang panel ang kani-kanyang *working group* para sa Political and Constitutional Reforms. Magsisimula ang pagpupulong ng dalawang grupo sa Oktubre 2011.

Muli ring bubuhayin ang Joint Monitoring Committee (JMC), pitong taon matapos ito isaisantabi ng GPH. Bubuuin nila ang gabay para sa mga operasyon ng JMC at magpupulong ito sa Marso 2011.

Alinsunod sa Joint Notes

Kasaysayan ng kawalang katarungan

Nagsampa ng kasong sibil noong 1986 sa Hawaii Federal District Court ang 9,539 biktima ng paglabag sa karapatang-tao laban samga Marcos at kanilang propyedad. Noong 1992, inilabas ng korte ang husga nitong nagkasala si Marcos sa mga krimen ng paglabag sa karapatang-tao. Inutusan ang mga Marcos na bayaran ng \$1.97 bilyon ang mga biktima bilang danyos.

Noong 1998, nagpasya ang kataas-taasang hukuman ng Switzerland na ibalik sa Pilipinas ang \$640 milyong nakaw na yaman ng mga Marcos na nakadeposito sa mga bangkoon. Alinsunod sa desisyong iyon, ang pondo ay ipinasok sa isang bangko na pangangalagaan ng gubyerno ng Pilipinas. Mula sa pondong ito ay kukuha ng halagang gagamitin para igawad ang danyos sa mga biktima ng paglabag sa karapatang-tao. Isasagawa ito alinsunod sa isang bubuuing batas para sa kompensasyon ng mga biktima. Bahagi ng kailangang resolbahin ang umiiral na batas na nagsasaad na ang mababawing nakaw na yaman ng mga Marcos ay gagamiting pondo para sa reporma sa lupa.

Noong 2003, iniutos ng

Korte Suprema ng Pilipinas ang paglilipat ng pondong ito sa tesorero ng gubyerno. Dahil dito, noon pa man ay pinangambahan na ng mga biktima na hindi na ito magagamit para sa kompensasyon. Matapos ang mahigit 15 taon, hindi pa rin naipapasa ang batas para sa kompensasyon ng mga biktima. Ang panukalang batas ay dati nang idineklarang prayoridad sa Kongreso subalit hinarang ng nagdaang rehimeng Arroyo. Muli itong isinampa nina Bayan Muna Rep. Neri Colmenares at Teddy Casiño sa Kongreso noong Disyembre 2010.

Kaduda-dudang areglo. Sa pamamagitan ni Atty. Robert Swift, naghabol ng pakikipag-areglo sa mga Marcos ang ilang grupo na dating kabilang sa

orihinal na nagsampa ng kaso. Si Swift ay isa sa mga abugado sa kasong isinampa sa Hawaii, subalit matagal nang itinakwil ng karamihan ng mga biktima.

Ang halagang ipinamahagi nitong Marso ay bahagi ng \$10 milyong pakikipag-areglo ni Swift kay Jose Campos, isang kilalang kroni ni Marcos na nakabase sa US. Ang \$2.5 milyon ay mapupunta kay Swift samantalang ang \$7.5 milyon ang ipamamahagi sa mga biktima. Gumawa si Swift ng sariling sistema ng pagtukoy kung sino ang mga biktima na iba pa sa ginawa ng korte sa US.

Malaki ang pagdududa sa ginawang pakikipag-areglo. Ang kabuuang halaga ng propyedad na nasa kontrol ni Campos ay umaabot sa \$78 milyon, subalit pumayag si Swift na \$10 milyon lamang ang kunin para sa bayad-pinsala. Nangangahulugan ito na mananatili sa kontrol ni Campos ang halos 90% ng nakaw na yaman. **AB**

noong Enero 18, 2011, sisikapin ng GPH ang kagyat na pagpapalaya sa lahat o karamihan sa 14 na ikinulong na konsultant at personalidad na saklaw ng JASIG bago ang pangalawang serye ng pormal na usapan. Noong 2004, nagbitiw na ng katulad na pangako ang GPH, subalit hindi ito natupad. Ngayong 2011, idinagdag ng NDFP ang mga pangalan nina Danilo Badayos, Leopoldo Calloza, Alan Jazmines at Ramos Patriarca sa listahan ng mga ibeberipika alinsunod sa JASIG Supplemental Agreement.

Ayon sa NDFP, masalimuot at pabagu-bago ang naging takbo ng usapan. Hindi naging malinaw hanggang sa kahuli-hulihan kung ang usapan ay magtatapos sa positibo o negatibong katayuan o kung mababalam itong muli. Gayunpaman, kinikilala ng NDFP na gayon ang katangian ng mga usapan at patunay ng pagpupursige ng dalawang panel ang mga puntong napagkaisahan. Kinikilala rin ng NDFP na maraming binitiwang mga pusi-syon ang dalawang panig, kung kaya naging posible ang pagsulong ng usapan.

Isa sa mga binitiwang pusi-

syon ng GPH ang pagturing nitong teroristang organisasyon ang PKP at BHB, gayundin ang punong konsultant ng NDFP na si Jose Maria Sison. Gayunpaman, dapat obligahin ng GPH ang mga armadong pwersa nito, laluna ang pulisya at militar, na galangin ang panibagong pusisyon ng GPH. Pinalalahanan ng NDFP ang GPH na hanggang sa magkaroon ng magkatugong deklarasyon ng tigil-putukan, binabansagan pa rin ng PNP ang PKP, BHB at NDFP na mga “teroristang komunista.”

Sa kabila ng deklarasyon ng magkatugong tigil-putukan, laganap at walang patid pa rin ang mga operasyong militar ng AFP sa ilalim ng *civil-military operations* (CMO) sa ilalim ng Oplan Bayanihan.

Hinamon naman ni Fidel Agcaoili, tagapagsalita ng NDFP *peace panel*, ang rehimeng Aquino na mahigpit na manindigan para lutasin ang ugat ng armadong tunggalian kung gusto nitong magkaroon ng tunay na pakikipagkasundo sa rebolusyonaryong kilusan. Aniya, kung gusto ng GPH at ng panel nito na pabilisin ang

usapan at magkaroon ng kasunduan sa pulitika, dapat bigyan nito ng konsiderasyon ang sampung-puntong mungkahi para sa Concise Agreement for an Immediate Just Peace na isinumite ng NDFP sa GPH noong Agosto 2005. Kung talagang interesado ang GPH na matapos ang mga kasunduan ayon sa itinakdang panahon, ani Agcaoili, dapat mas naging determinado ang GPH na itakda ang kasunod na serye ng usapan.

Binati naman ng PKP ang matagumpay na muling pagbubukas ng usapan at ang pinagkaisahan nitong iskedyul ng mga pag-uusap. Gayunpaman, pinaalalahanan ng PKP ang mamayan na dantaon nang umiiral ang mga problema sa pulitika at ekonomya na nasa ugat ng armadong tunggalian. Kabilang dito ang sistematikong pagsasamantala at pang-aapi na dulot ng kawalan ng lupa, kahirapan at laganap na kawalan ng trabaho. Mahirap lutasin ang gayong malalalim na problema sa loob lamang ng 18 buwan. Dagdag pa rito, walang tigil ang mga armadong pwersa ng rehimen sa pananabotahe at pagdiskaril sa usapan. **AB**

Daet 4, pinalaya na

Pinalaya noong Pebrero 4 ang apat na aktibista at lider-masang Piligal na inaresto sa isang reyde ng militar noong Nobyembre 2010.

Sina Esmeraldo Bardon (tagapangulo ng Kilusang Magbubukid ng Pilipinas-Camarines Norte), Denver Bacolod (istap ng Karapatan-Camarines Norte), Merlo Bernas (myembro ng Kabataan Party) at Elpidio de Luna (isang kalalaya lamang noon na detenidong pulitikal) ay basta na lamang dinampot sa upisina ng *provincial chapter* ng Karapatan at iba pang progresibong grupo noong Nobyembre 10. Tinagurian silang “Daet 4.”

Walang mandamyento de

aresto ang mga sundalo at pulis nang hulihin sila. Tinangay din ng mga nangreyd na pasista ang kanilang mga kagamitan sa upisina, personal na gamit at perang nagkakahalagang ₱5,500. Hanggang ngayon ay hindi pa ibinabalik ang mga ito sa kanila.

Pinaratangan silang mga myembro ng Bagong Hukbong Bayan at tinamnan ng mga eksplosibo ang upisina para masampahan sila ng kasong kriminal. Sinampahan din sila ng ka-

song rebelyon at pang-uupat ng sedisyon.

Nauna na silang pinawalang-sala sa kasong rebelyon at pang-uupat ng sedisyon. Nang maibasura na ang kaso hinggil sa ilegal na pag-iingat ng mga eksplosibo, hindi na umapela ang pulisya. Anang abugado ng Daet 4, “Alam nilang walang patutunguhan ang kaso dahil gawa-gawa lamang ito.” Bagkus ay nakiusap pa ang pulisya na huwag na silang sampahan ng kontra-asunto dahil pinilit lamang daw sila ng militar na isampa ang gayong mga kaso laban sa “Daet 4.” Naghahanda ngayon ang kanilang abugado na kasuhan ang militar. **AB**

Paglabag ng AFP sa tigil-putukan, binatikos

Mahigpit na sinuportahan ng Partido Komunista ng Pilipinas, Bagong Hukbong Bayan (BHB) at lahat ng rebolusyonaryong pwersa ang magkatugong pitong-araw na tigil-putukan na idineklara kapwa ng NDFP at GPH bilang pagsuporta sa usapang pangkapayapaan. Gayunman, binatikos ni Kasamang Luis Jalandoni, tagapangulo ng NDFP Negotiating Panel, ang patuloy na paglabag ng mga pwersang panseguridad ng GPH sa tigil-putukan sa iba't ibang bahagi ng bansa.

Sa Mindanao pa lamang, ayon kay Jorge "Ka Oris" Madlos, tagapagsalita ng NDF-Mindanao, nagkaroon ng 23 kaso ng paglabag sa tigil-putukan sa mga prubinsya ng Bukidnon, Davao Oriental, Davao del Norte, Compostela Valley at Surigao del Norte. Tahasang nilabag ng mga pwersa ng AFP-PNP-CAFGU ang kanilang idineklarang tigil-putukan sa Southern Mindanao Region nang maglunsad sila ng operasyong kombatan sa mga kabundukan ng Compostela Valley, Davao Oriental at Agusan del Sur laban sa BHB sa desperadong tangkang iligtas ang pinangangalagaan nitong tatlong bihag ng digma.

Noong Pebrero 24, iniulat ni Ka Greg Bañares, tagapagsalita ng NDF-Bicol, na may di bababa sa 19 na kaso ng paglabag ang AFP sa tigil-putukan sa rehiyon. Aniya, tuluy-tuloy ang mga opensibong operasyon at armadong probokasyon ng AFP sa mga sonang gerilya rito.

Kinabibilangan ito ng 14 na operasyong kombatan at limang kaso ng malulupit na operasyon ng Reengineered Special Operations Teams (RSOT). Labintatlong (13) barangay sa mga bayan ng Casiguran, Gubat at Sorsogon City ang patuloy na inaatake ng operasyong SOT. Sangkot na mga pwersa ang 49th IB at 903rd Brigade habang 23 barangay sa bayan ng Aroroy, Masbate ang isinailalim sa operasyong SOT ng 9th IB at 903rd Brigade mula Pebrero 2 hang-

gang sa kasalukuyan.

Ipinakikita nito na hindi kaya ng gubyernong Aquino na pasunurin at disiplinahin ang mga tauhan nito sa AFP upang iga-lang kahit ang sarili nitong dekarasyon ng tigil-putukan. Walang katiyakan, kung gayon, na igagalang at ipatutupad ng gubyernong Aquino at ng AFP ang mga kasunduang ibubunga ng negosasyong pangkapayapaan sa pagitan ng GPH at ng NDFP, sabi pa ni Bañares.

Noong Pebrero 15, kasabay ng pagsisimula ng tigil-putukan ay sinimulan din ng 2nd IB at 901st Brigade ang operasyong SOT sa mga barangay ng Talintalin, Apod at Rawis sa bayan ng Libon, Albay. Mag-iisang buwan na rin ang operasyong SOT ng 2nd IB sa mga barangay ng Balabagon at Cavit sa bayan ng Manito, Albay.

Kahit umiiral na ang tigil-putukan ay nagsasagawa pa rin ng operasyong kombatan ang 42nd IB sa apat na barangay ng Caramoan, Camarines Sur. Naglunsad naman ng operasyong militar ang 2nd IB sa mga barangay ng Quinartelan at Manawan sa bayan ng Camalig, Albay at sa mga barangay ng Maogog, San Roque at San Vicente sa bayan ng Jovellar, Albay mula Pebrero 16 hanggang 21.

Sa Sorsogon, palihim na pumasok sa ilang barangay ng Bulan at sa hangganan ng mga bayan ng Barcelona at Gubat ang mga tropa ng 49th IB bago magkabisa ang tigil-putukan noong Pebrero 15. Ilang

araw silang nagtago sa kasukalan ngunit bigong matagpuan ang yunit ng BHB kaya bumalik na lamang sa kanilang mga kampo.

Patraydor na sinalakay ng isang yunit ng 49th IB ang isang yunit ng BHB sa Barangay Magdagosong, Irosin, Sorsogon noong Pebrero 16 ng madaling araw. Maagap namang nagpaabot ang mga taumbaryo sa mga Pulang mandirigma at ligtas na nakaatras ang yunit ng BHB nang walang nangyaring putukan.

Noong Pebrero 21, bandang alas-9 ng gabi, sinalakay ng nakademit-sibilyang mga sundalo ng 49th IB ang Barangay San Juan Daan sa bayan ng Bulan, Sorsogon. Nakasakay sila sa isang *van* at dalawang motorsiklo at iligal na pinasok at hinailughog ang limang bahay ng mga sibilyan. Hinahanap daw nila ang isang kasapi ng BHB sa lugar.

Noon namang Pebrero 14, isang araw bago magbukas ang usapan ay dinakip ng mga pwersa ng 7th ID si Kasamang Alan Jazmines, isa sa mga konsultant ng NDFP sa usapang pangkapayapaan na saklaw ng proteksyon sa ilalim ng Joint Agreement on Safety and Immunity Guarantees (JASIG).

Sa Samar, nagkaengkwentro ang dalawang Pulang mandirigma at mga pinaghihinalaang elemento ng 34th IB na matalagal nang nakaposisyon para sa pananambang sa gilid ng Barangay Cataydungan, San Jose de Buan noong Pebrero 16-17. Walang kaswalti sa panig ng BHB.

Kinabukasan, dalawang kolum naman ng mga sundalo ang nag-operasyon sa Barangay. San Isidro at Cataydungan, samantalang may isa pang kolum na nanggalugad sa may bahaging gubat. Nagtuluy-tuloy ang kanilang operasyon hanggang sa katapusang linggo ng Pebrero.

AB



Mga aktibista ng KMP at BM, pinaslang

Walang awang pinaslang ng militar ang isang aktibista ng Bayan Muna (BM) sa Albay at isang lider-magsasaka sa Davao del Sur. Pinagbabaril din ng mga sundalo ang isang grupo ng mga Aggay sa Cagayan at ibinintang ang krimen sa Bagong Hukbong Bayan (BHB).

Marso 1. Inaresto ng mga pulis ng Bacolod City si Rogina Quilop, 42, sa Bacolod-Silay *airport*, bandang alas-6:30 ng gabi, sa gawa-gawang kaso ng arson. Inaakusahan siyang kasapi ng BHB at sangkot sa pagsunog ng isang *transloading station* sa bayan ng Toboso, Negros Occidental. Ang totoo, si Quilop ay tagapamahala ng isang lokal na kooperatiba at myembro ng Karapatan.

Pebrero 27. Pinaslang ng mga elemento ng 39th IB ang mag-amang Rody at Rody Rick Dejos sa Sityo Malusing, Barangay Zone 1, Sta. Cruz, Davao del Sur. Ang nakatatandang Dejos ay pangalawang tagapangulo ng lokal na sangay ng Kilusang Magbubukid ng Pilipinas (KMP) at aktibo sa kampanya laban sa Barangay Defense System at panghahas ng militar sa kanilang baryo. Dahil dito, ang kanyang pangalan ay unang-una sa listahan ng 39th IB ng mga tagabaryo na pinapupunta sa detatsment para sumailalim sa interogasyon.

Tinakot at pinilit siyang papi-mahin sa dokumentong nagsasaad na isa siyang kasapi ng kilusang lihim na sumunder. Noong 2009, sinabihan siya ng 39th IB na lusawin ang lokal na tsapter ng KMP. Nitong Disyembre ay pinaputukan siya ng mga sundalo ng 39th IB para takutin. Sa kabila ng lahat ng panggigipit ay hindi itinigil ng nakatatandang Dejos ang kanyang mga aktibidad kaya siya pi-

naslang. Pinatay naman si Rody Rick dahil nasaksihan niya ang pagpaslang sa kanyang ama.

Pebrero 27. Pinwersa ng mga elemento ng 39th IB ang magkapatid na Johnson at Danilo Tio, parehong taga-Sityo Tambulang, Barangay Danwata, Malita, Davao del Sur na pumapel bilang mga surenderi ng BHB na bumaba umano mula sa kabundukan dahil sa kagutuman at kahirapan. Ang magkapatid na Tio ay mga karaniwang tagabaryo na kailanma'y hindi naging myembro ng anumang yunit ng BHB. Sa ngayon ay detenido pa rin sila ng militar sa New Argao, Malita, Davao del Sur.

Pebrero 25. Pinaslang ng mga elemento ng 9th ID si Rodel Estrallado, isang aktibista ng Bayan Muna. Dinukot si Estrallado ng militar sa tapat ng isang *basketball court* sa Barangay 3 sa Malilipot, Albay. Ayon sa mga testigo, nagpakilala ang mga armadong militar na mga ahente ng Philippine Drug Enforcement Agency (PDEA). Pwersadong isinakay si Estrallado sa isang naghihintay na *van* na may plate number na MSL-902. Pinabulaanan ng mga upi-

syal ng PDEA na sila ang nagpatupad ng naturang operasyon.

Nagkabuhul-buhol ang dila ni Maj. Harold Cabunoc, tagapagsalita ng 9th ID nang pilit nitong pagtakpan ang krimen ng militar. Pinalalabas ni Cabunoc na si Estrallado ay isang mandirigma ng BHB na napatay daw sa isang engkwentro sa Barangay Bulwang, Bato, Camarines Sur. Subalit hindi niya mai-paliwanag kung papaanong napatay si Estrallado sa isang engkwentro na nangyari sa Camarines Sur mahigit dalawang oras bago siya dukutin sa Albay.


Pebrero 12. Tinakot ng nag-ooperasyong mga elemento ng 17th IB si Tokong Tayan, magsasaka ng Sityo Camandarinan, Barangay Camandarinan, Sta. Teresita, Cagayan at pinagbantaang papatayin ang kanyang anak kung hindi niya aaminin na nagbase ang BHB sa kanyang purok.

Nasalubong din ng mga sundalo ang isang nagngangalang Balong at pinaipitan ng bala sa pagitan ng mga daliri.

Sinira ng kaaway ang mga mais ng magsasakang si Bong Tacla. Pinatid nila ang bakod na *barbed wire* sa maisan ni Tacla at inapak-apakan at pinagsisipa ang mga tanim.

Ipinakain din ng mga sundalo sa aso nila ang manok ni Ely Talbo at hindi ito binayaran.

Pebrero 9. Walang awang tinambangan ng mga nag-ooperasyong tropa ng 17th IB at RMG ang isang pangkat ng magkaka-mag-anak na minoryang Aggay, na magbababa sana ng kanilang produktong yantok, sa Sityo Nagsicoan, Barangay Villa Cielo, Buguey, Cagayan bandang alas-11 ng tanghali. Napatay si Julie Rosal, 32 anyos, habang nasugatan naman ang kanyang kapatid na si Elvis Rosal, 28



"Aktibista..." sundan sa pahina 7



6 patay, 9 sugatan sa mga ambus ng BHB

Di bababa sa anim na elemento ng pasistang kaaway ang napatay at siyam ang nasugatan sa tatlong pananambang na inilunsad ng Bagong Hukbong Bayan (BHB) nitong Pebrero. Apat na malalakas na armas ang nasamsam at matagumpay ding napatigil ng mga gerilya ang mapaminsalang operasyon ng isang minahan.

Pebrero 26. Nasamsam ang tatlong ripleng M16 at isang M14 nang ambusin ng mga Pulang mandirigma ng Sergio Lobina Command ng BHB ang mga pulis na *security escort* ni Mayor Rolando Evardone ng Arteche. Ang pananambang ay inilunsad sa Barangay Catumsan, Arteche, Eastern Samar. Ayon kay Ka Karlos Manuel, tagapagsalita ng Efren Martires Command ng BHB sa Eastern Visayas, napatay dito si P/Insp. Al Tandiado at nasugatan ang tatlo niyang tauhan.

Pagparusa ito sa mga pwersa ng Philippine National Police-Regional Mobile Group dahil sa aktibo nilang paglahok sa mga operasyong pangkombat laban sa BHB, dagdag pa ni Ka Manuel. Sa kabilang banda, ayon kay Ka Manuel, iniimbestigahan pa ang pagkakasugat ni Noe Operario, isa umanong sibilyang nahagip ng bala sa naturang ambus.

Pebrero 26. Inambus ng

isang yunit ng Nona del Rosario Command ng Bagong Hukbong Bayan (BHB-NDRC) ang mga elemento ng 86th IB bandang alas-10:30 ng umaga sa hangganan ng Barangay Cawayan, Asipulo at Barangay Ambasa, Lamut sa lalawigan ng Ifugao. Di bababa sa tatlong sundalo ang napatay at apat ang malubhang nasugatan habang may ilan pang nawawala. Ayon kay Ka Wigan Moncontad, tagapagsalita ng BHB-NDRC, halos dalawang buwan nang nananalanta sa lugar ang 86th IB. Patuloy naman silang nasubaybayan sa tulong na rin ng mamamayan.

Pebrero 1. Tinambangan ng mga Pulang mandirigma ng Henry Abraham Command ng BHB ang mga nag-ooperasyong tropa ng 17th IB Bravo Coy na pinamumunuan ni Lt. Randy Bagaporo sa Sityo Bocali, Barangay Mision, Sta. Teresita, Cagayan, bandang alas-3 ng hapon. Napatay dito ang dalawang sunda-

lo habang nasugatan ang dalawa pa. Samantala, ligtas na na-kaatras ang lahat ng mga gerilya.

Ilang oras bago ang pananambang, pinahinto rin ng BHB ang operasyon ng *quarrying* sa Mision River sa Barangay Rebeca, Gonzaga, sa batayang labis na ang pagkasira ng naturang ilog, na nagdudulot ng pagkatibag ng mga maisan sa magkabilang pampang nito at pagkahibas ng irigasyon sa mga palayan ng Barangay Rebeca at Isca. Agad namang iniatras ng mga tauhan ng mga kumpanya at ng reaksyunaryong gubyerno ang kanilang mga *dumptruck* at mga makinarya.

Agad na tinugis ng 17th IB ang BHB para proteksyunan ang interes ng mga mapanira-sa-kalikasang kumpanya ng *quarrying* na pinalayas ng BHB. Para pagtakpan ang kanilang kahihiyan, pinalabas ng militar sa midya na isang engkwentro ang naganap noong Pebrero 1, at sila umano ang nakapatay ng isang mandirigma at nakasamsam ng isang M14 at mga magasin. Ang totoo, ang ipinakita sa programang TV Patrol-Cagayan Valley ay bangkay ng namatay nilang sundalo, habang ang M14 naman ay ang hawak nito noong labanan. **AB**

"Aktibista..." mula sa pahina 6

anyos, at hipag na si Mannang Rosal, 30 anyos. Hindi binigyan ng karampatang atensiyong medikal ang mga biktima at basta na lamang sila iniwan matapos maihatid sa Toran District Hospital sa Aparri, Cagayan.

Ibinintang naman ng militar sa BHB ang pananambang sa napakaestupidong dahilan na "naganap ang pananambang sa kagubatan." Hawak pa rin ng militar ang bangkay ni Rosal at pilit na nilang pinababakwit ang iba pang mga Aggay patungong *barangay hall* ng Villa Cielo para takutin ang mga ito, at palabasing ang BHB nga ang nanambang sa kanila.

Pebrero 2. Hinuli ng mga naka-*bonnet* na nag-ooperasyong tropa ng 17th IB si Bong Garaya ng

Barangay Rebeca, Sta. Teresita, Cagayan. Inilublob siya ng mga sundalo sa irigasyon sa Barangay Cabambanan Norte sa pareho ring bayan.

Noong araw ding iyon ay dinukot ng naturang mga sundalo si Lovejoy Alariao, 14 anyos na dalagita na taga-Barangay Rebeca. Hanggang ngayon ay hindi pa natatagpuan si Alariao.

Pebrero 1. Ilang menor-de-edad na nakasalubong ng mga elemento ng 17th IB sa Sityo Bocali, Barangay Mision, Sta. Teresita, Cagayan ang pinilit nilang maggiya sa kanilang "clearing operations" at pagrerekorida sa mga burol na pinaghihinalaan nilang pinagkukublihan ng BHB. Mula rin noong araw na ito ay nagkampo ang mga tropang ito sa Rebeca Elementary School at mga bahay sa naturang sityo. **AB**



Pagpupugay kay Procopio “Ka Pyro” Tauro

Lider rebolusyonaryo, bayani ng masa

Alas-5:20 ng umaga noong Oktubre 30, 2010. Si Ka Pyro ang isa sa mga Pulang kumander na namuno sa taktikal na open-siba na inilunsad ng mga Pulang gerilya ng Agustin Begnalen Command. Sa unang sampung minuto ng labanan, tinamaan si Ka Pyro habang pinamumunuan niya ang pag-atake at tumayo para magpaputok ng *grenade launcher* laban sa mga kaaway mula sa Alpha Coy, 41st IB. Pagsapit ng alas-9:10 ng umaga, namatay ang butihing kasama, rebolusyonaryong lider at bayani ng masa. Mula sa simula, sa gitna ng paghahanda, hanggang sa pagpapatupad, matatag si Ka Pyro sa paggabay at pamumuno sa matagumpay na taktikal na opensba sa Abra-Kalinga Road, Lenneng, Baay-Licuan, Abra.

Si Ka Pyro (Procopio Tauro) ay ipinanganak at lumaki sa Benben, Lapaz, Abra. Ang kanyang pamilya ay mga kasamá, at kinagisnan niya ang malupit na buhay ng mga magbubukid at ang terorismo ng mga *warlord*. Nakapag-aral siya sa pamamagitan ng mga *scholarship* at pinalitaw niya ang iba pa niyang mga pangangailangan sa pamamagitan ng sariling pagsisikap. Kahit mga di organisadong aktibista lamang sila noon, nagalit sa kanilang pamilya ang mga *warlord* dahil sa kanilang pag-suporta sa rebolusyonaryong kilusan at pag-anib sa tradisyunal na oposisyong partidong pampulitika. Pinatay ng mga *warlord* ang kanyang kapatid na lalaki, at siya at ang kanyang ama ay ikinulong nang humigit-kumulang isang taon dahil sa kasong rebelyon.

Matatag si Ka Pyro sa rebolusyonaryong pakikibaka at gagap niya ang mga batayang rebolusyonaryong prinsipyo dahil sa kanyang mga karanasan sa buhay at matalas niyang pag-unawa sa rebolusyonaryong teorya. Sa buong serbisyo niya sa BHB, naging mainit ang pa-


kikitungo sa kanya ng mga mag-sasaka pangunahin dahil sa pagpupunyagi niyang maglunsad ng rebolusyong agraryo. Mahusay siyang organisador. Matatag din siyang lumaban sa warlordismo. May mga kahinaan siya sa paglalapat ng ilang rebolusyonaryong patakaran, dalawahang taktika at pagbubuo ng nagkakaisang prente pero ang mga ito ay sekundaryo na lamang sa kanyang pangkalahatang paggampan ng gawain.

Pinamunuan ni Ka Pyro ang pagbreyktru sa mahihirap na gawain ng Partido at BHB na kadalasang inaayawan ng ibang mga kasama. Isa siya sa mga beterano ng gawaing rekoberi at ng patuloy na pagkilos sa iba't ibang erya sa Abra at sa ka-

lapit na mga munisipalidad, tulad ng BuDaBoSa (Bucloc, Daguioman, Boliney, Sallapdan); hangganang LaDaLaga (Lapaz, Danglas, Lagayan) sa Abra, Ilocos Norte at Ilocos Sur; at hangganang Abra-Mt. Province-Ilocos Sur. Hindi niya ininda ang walang tigil na pang-aatake ng kaaway at mahirap na buhay gerilya at pinamunuan niya ang mga kasama para mapalakas ang kanilang rebolusyonaryong katatagan at pagpupunyagi.

Si Ka Pyro ay mahusay na guro at propagandista sa hanay ng batayang masa. Malalim ang kanyang gagap sa mga problema ng mamamayan at mahusay siya sa pagdedetalye ng iba't ibang isyu at pangyayari. Nagsilbi itong kongkretong halimbawa ng rebolusyonaryong teorya at epektibong instrumento sa pagpapaliwanag sa mamamayan ng mga patakaran at programa ng rebolusyonaryong kilusan.

Bilang biktima ng burgis-dekadenteng buhay noong nag-aaral pa siya sa kolehiyo at sa maikling panahong naging empleyado siya ng gubyrerno, namuhay si Ka Pyro bilang lumpen-intelektwal. Marami siyang naging bisyo at mga burgis-pyudal na relasyon. Ang kanyang mga kongkretong karanasan sa burukrata kapitalismo habang nasa reaksyunaryong gubyrerno ang tumulak sa kanyang magpursige sa paglaban sa warlordismo at korapsyon. Bilang ligal na aktibista sa sentrong bayan ng Bangued, nagkaroon siya ng malalim at malawak na gagap sa kalagayan ng prubinsya at ng mga kinakailangang gawain dito. Nang magkasakit siya dahil sa kanyang mga bisyo, nagpasya siyang itakwil ang lahat ng ito. Mula nang pumasok siya sa BHB ay naging malusog na ang kanyang pamumuhay. Nagkaroon siya ng isang anak na babae na



mahal na mahal niya—bunga ito ng isang relasyon bago siya sumanib sa BHB. Matiyaga niyang hinintay ang pagkakataong makipagkita sa kanyang anak at ihabol ang paggampan bilang magulang at pagkakaroon ng limitadong buhay-pamilya.

Sa kabila ng mga aksyong pandisiplinang iginawad sa kanya dahil sa kanyang mga dating pagkakamali, si Ka Pyro ay naging huwaran ng pagwawasto at rebolusyonaryong pagpupunyagi. Kahit sa panahon ng krisis at pagkakamali, palagi niyang taglay ang rebolusyonaryong optimismo. Walang humpay ang kanyang pananalig sa pagwawasto, at palagian siyang tumatanaw sa maaliwalas na rebolusyonaryong hinaharap. Kahit sa panliligaw at pag-ibig ay matiyaga siya at may di natitinag na optimismo.

Matatag ang pag-unawa at pagprayoritisasi ni Ka Pyro sa armadong rebolusyonaryong pakikibaka at ang pananalig niya sa pagkamakatarungan nito. Upang malabanan ang konserbatismong militar, sumama siya sa mga operasyong militar at aktibong lumahok sa Provincial Operational Command. Ang taktikal na opensiba noong Oktubre 30, 2010 ang naging huling proyekto ni Ka Pyro. Direkta siyang kasangkot sa paghahanda, paglutas sa mga gusot sa gawaing paniktik, pagpapalano ng labanan at pagsasagawa ng *dry run* hanggang sa aktwal na implementasyon. Isinakripisyo niya ang kanyang buhay upang isulong ang armadong rebolusyonaryong pakikibaka, biguin ang Oplan Bantay Laya 2 at isulong ang rebolusyon tungo sa estratehikong pagkapatas hanggang sa ganap na tagumpay.

Ang buhay ng isang rebolusyonaryo ay dapat sukatin sa kanyang aktwal na mga ambag sa pagrerebolusyon. Walang duda na ang rebolusyonaryong papel ni Ka Pyro ay importante at may estratehikong halaga hindi lamang sa Abra kundi sa buong rehiyon ng Ilocos-Cordillera. Nakitil ang buhay ng isang rebolusyonaryo subalit ang kanyang mga pangarap at mithiin ay magpapatuloy sa pamamagitan ng mamamayan at mga rebolusyonaryong tinulungan niyang mapukaw, magorganisa at kumilos. Si Ka Pyro ay di lamang namatay na rebolusyonaryo kundi bilang lider proletaryo. **AB**

Treyning ng mga medik sa Samar, idinaos

Matagumpay na idinaos ng yunit medikal ng Efren Martires Command ng Bagong Hukbang Bayan nitong Enero-Pebrero ang isang pagsasanay sa layuning pataasin ang antas ng kakayahan ng makinarya para sa pangangalaga ng kalusugan at pangangailangang medikal ng mga yunit pangkombat ng hukbo.

Bukod pa sa pagpapataas ng kakayahan sa pangagamot, ang nakapagtapos na isang iskwal ng mga medik mula sa iba't ibang platung gerilya at paramedik mulang sa mga samahang masa ay magsisilbi ring mga medik-instruktor na may kakayahang magsanay sa susunod pang grupo ng mga medik at paramedik. Ikaapat na itong pagsasanay sa ilalim ng yunit medikal ng EMC sa Samar at Leyte, kung saan daan-daang magsasaka rin ang natulungan ng mga medik ng BHB.

Inilinaw sa pagsasanay na ang gawaing medikal ay regular na trabaho at hindi lamang ginagampan kung mayroon nang pasyenteng nangangailangan ng tulong. Pinaunlad din dito ang oryentasyon ng medik ng platoon (P5) batay sa Mga Regulasyon ng Platoon Gerilya at naipaliwanag na isa itong malawak na gawain.

Kasabay nito, nag-aral ng Intermedyong Kursong Pangkalusugan ang mga kasapi ng P5 ng dalawang platoon. Mas masinsin nilang pinag-aralan ang mga bahagi at proseso ng katawan ng tao (*anatomy and physiology*), paggamot sa iba't ibang ordinaryong sakit, tamang pag-alaga sa pasyente (*nursing skills*), paggamit ng *anesthesia*, menor na pag-oopera at *dentistry*.

Dumaan din sa praktikum ang mga kasapi ng P5. Inalam nila kung paano kinukuha ang kasaysayan ng sakit (*case history*). Nag-aral din sila ng *diagnosis* at *trauma management* o pag-alaga sa sugat mula sa punglo (*gunshot wound* o *GSW*). Tinutukan sa *trauma management* ang mga sugat mula sa bala dahil kailangang mapataas ang kakayahan ng mga medik ng platoon sa harap ng pagsusulong ng digmang bayan tungo sa bago at mas mataas na antas.

Pagkatapos ng pag-aaral, sumabak agad ang mga medik-estudyante sa paglilingkod sa dalawang baryo kasama ang kanilang mga instruktor. Mahigit 100 magsasaka ang nabigyan ng serbisyo tulad ng tsek-*ap*, *acupressure*, pagbunot ng ngipin, pagtutuli, pagtanggap ng *cyst*, pagpaliwanag sa masa ng sanitasyon, nutrisyon at mga komon na sintomas ng sakit, *reflexology*, at pamamahagi ng mga halamang gamot at produkto. **AB**

Rehimeng Aquino, inutil sa harap ng pagsirit ng presyo ng langis

Nagpapakainutil ang rehimeng Aquino sa harap ng sunud-sunod na pagtaas ng presyo ng gasolina, krudong langis at iba pang produktong petrolyo nitong nakaraang mga linggo. Sa kabila ng labis na pabigat na dulot ng pagsirit ng presyo ng langis, walang ginawa ang Malacaang para pangalagaan ang interes ng mamamayan laban sa pagkamal ng supertubo ng mga dayuhang kumpanya sa langis.

“Ang pagtataas ng presyo ng langis ay kinakailangan,” ang tanging isinaad ng Malacaang matapos ang sunud-sunod na pagtataas ng mga dayuhang kumpanya ng langis sa presyo ng mga produkto nila noong nakaraang linggo. Sa loob ng apat na araw, itinaas nang hanggang P2 bawat litro ang presyo ng gasolina at iba pang produktong petrolyo.

Isinangkalan ng mga gahamang dayuhang kumpanya sa langis ang pampulitikang kaguluhan at namumuong gera sibil sa Libya upang pasiritin ang presyo ng langis. Ang totoo, wala pa sa 1% ng pandaigdigang produksyon ng langis ang apektado bunsod ng pagbagal ng produk-

syon nito sa Libya.

Umaabot na ngayon sa \$110-120 kada bariles ang presyo ng langis sa pandaigdigang pamilihan. Ito ngayon ang ginagamit ng mga dayuhang kumpanya sa langis upang bigyang-matwid ang sunud-sunod na pagtataas nila ng presyo ng langis sa lokal na pamilihan. Mula Enero ay umabot na sa mahigit P5 kada litro ang itinaas ng presyo ng mga produktong petrolyo sa Pilipinas. Katunayan, malaking bahagi ng pandaigdigang suplay ng langis ay kontrolado rin ng dayuhang malalaking kumpanya ng langis na siyang nagmamay-ari sa mga lokal na kumpanya. Sa bawat pagtaas ng presyo sa lokal na

pamilihan, kung gayon, nagkakamal ang mga ito ng doble-dobleng tubo.

Tinutuligsa ng mga progresibong organisasyon at iba't ibang sektor ang kawalan ng kontrol sa pagpepresyo ng langis sa lokal na pamilihan. Ipinananawagan nila ang pagbabasura sa Oil Deregulation Law, ang batas na nagbibigay ng buong laya sa mga kumpanya sa langis na itakda ang presyo ng kanilang mga produkto at mangamkam ng supertubo.

Subalit sa halip na panigan ang panawagang ito ng mamamayan, mabilis na ibinasura ng Malacaang ang panukala sa katwirang kulang ang pondo ng gubyrerno para ipatupad ang regulasyon. Sa pananaw ng Malacaang, ang regulasyon ay paggarantiya ng estado na tuluy-tuloy na makapagkakamal ng tubo ang mga dayuhang kumpanya sa langis sa halip na pagkontrol sa tubo ng mga ito upang pangalagaan ang interes ng mamamayan.

Ang pagpapakainutil ng rehimeng Aquino sa pagharap sa tuluy-tuloy na pagtaas ng presyo ng langis ay magdudulot ng ibayong kahirapan sa mamamayan.

Pag-abandona sa mga OFW sa Middle East at North Africa

Mariing binatikos ng Migrante International ang rehimeng Aquino sa patuloy nitong pagpapabaya sa mga Overseas Filipino Workers (OFW). Bigo ang gubyrerno sa obligasyon nitong protektahan ang mga OFWs lalo na sa gitna ng matinding sigalot ngayon sa Middle East at North Africa.

Partikular na tinukoy ng Migrante ang ka-lagayan

ng mga OFW sa Libya. Ayon kay Gary Martinez, tagapangulo ng Migrante, 6% lamang mula sa mahigit 26,000 OFW sa Libya ang nailikas ng gubyrerno pabalik sa Pilipinas. Sinabi rin ni Martinez na hindi dapat magtakda ng dedlyan ang gubyrerno sa paglili-

kas ng mga Pilipino dahil nasa panganib ang buhay ng mga manggagawa roon.

Insulto rin ang ibinibigay na P10,000 sa mga OFW na umuwi, dahil halos \$150,000 ang inilaan ng DFA para sa paglilikas bukod pa sa P200 milyong ibinigay ng Overseas Workers Welfare Administration (OWWA). Wala ring inialok na maayos na trabaho para sa kanila. Kung gaano kabilis magpadala ang Malacaang ng OFW para magbenta ng lakas-paggawa sa ibang bansa, ganoon naman sila kabagal na tugunan ang mga hinaing ng mga ito, pahayag pa ni Martinez. Ayon naman sa ulat ng Migrante-Middle East, isang OFW ang nasawi sa Libya matapos lu-



musob ang mga di kilalang armado sa kumpanya kung saan siya nagtrabaho. Inaalam pa kung tinamaan ng bala o bumagsak mula sa *rig* ang OFW. Ilang OFW naman ang napaulat na pwersa-hang lumikas patungo sa kalapit na bansa sa pamamagitan ng pagtawid sa disyerto. Ang ilan ay nagkululang na ng pagkain habang ang iba ay nagkakasakit na sa matinding init at pagod.

Sinabi naman ng Kilusang Mayo Uno (KMU) na dapat magkaroon ng pangmatagalang plano sa kabuhayan at trabaho ang rehimeng Aquino para sa mga OFW. Babalik din, anila, ang mga OFW para makipagsapalaran sa ibang bansa kung walang maayos na trabahong ibibigay ang gubyrno rito sa Pilipinas. Nagprotesta ang Migrante at iba pang mga grupo sa Plaza Miranda sa Quiapo, Maynila noong Pebrero 28 upang igiit sa rehimen na magkaroon ng kongkretong aksyon sa mga inilikas na OFW. Maging ang ilang mga OFW na naipit sa ibang lugar ay nagpakita ng pagkadismaya sa pamamagitan ng pagdadala ng plakard na may nakalagay na “Mga salot sa OFW: P-Noy, DFA, OW-WA, DOLE, Philippine Embassy at POEA.”

Sa mga kalapit na bansa ng Libya, patuloy din

ang paghihirap ng mga OFW. Sa Egypt, bigo ang rehimeng Aquino na mailikas ang lahat ng mga OFW rito noong kasagsagan ng pagpapatalsik kay Hosni Mubarak. Apatnapu’t anim lamang ang umuwi mula sa 6,500 OFW nagtrabaho sa kabila ng ₱25 milyong inilaang pondo ng DFA para sa pagpapalikas sa mga manggagawang Pilipino roon.

Sa Bahrain, nanawagan ang Migrante-Middle East kay Aquino na magkaroon ng *contingency plan* para sa kaligtasan ng mga OFW doon. Umaabot sa 30,000 OFW ang nasa Bahrain ngayon.

Sa ibang bansa, samutsari rin ang mga isyung kinakaharap ng mga OFW. Sa China, may tatlong Pilipinong nahatulan ng kamatayan. Mayroong mga naging biktima ng pagbaha at kalamidad sa Middle East at Australia. May mga nasawi sa lindol sa New Zealand. Nariyan ang misteryosong pagkamatay ng isang Pilipino sa Saudi Arabia at patuloy na pagpasok ng mga OFW sa Afghanistan, Jordan at Iraq kahit idineklara nang iligal ang magtrabaho rito. Lahat ng ito ay patunay ng kabiguan ng rehimen na protektahan ang kaligtasan at karapatan ng mga Pilipinong nagtrabaho sa ibang bansa.

Kaguluhan sa Libya, sinasagpang ng US

Sinasagpang ng US ang kasalukuyang kaguluhan sa Libya para mapatalsik na ang lider nitong si Moammar Gadhaffi. Si Gadhaffi ang matagal nang pinuno ng Libya na kilala sa kanyang mga deklarasyong anti-US.

Ang pakikialam ngayon ng US sa Libya ay tulak ng interes nitong makontrol ang yamang langis ng Libya. Tahasan ngayon itong nakikialam sa panloob na mga usapin ng Libya nang igiit ni Pres. Barack Obama ng US noong Pebrero 28 na magbitiw na sa pwesto si Gadhaffi. Ilang barko de gera ng US mula sa Red Sea ang bumibiyahe ngayon patungo sa Libya upang bantaan si Gadhaffi.

Ang pag-aalsa sa Libya laban sa paghahari ni Gadhaffi ay nagsimula pa noong Pebrero 15. Bahagi ito ng kumakalat na apoy ng mga protesta sa Middle East at North Africa. Mula sa pinagsimulan nito sa Tunisia, pumutok na ang mga pag-aalsa sa Egypt,

Bahrain, Algeria, Morocco, Iraq, Oman, Yemen, Saudi Arabia, Qatar, Iran, Syria at Jordan. Humantong na ang mga protesta sa pagbabagsak ng matagal nang mga diktador sa Tunisia at Egypt.

Ang Libya ay isang bansa sa North Africa na may populasyong 6.5 milyon. Mayaman ito sa reserbang langis na may mas mataas na kalidad kung ihahambing sa Saudi Arabia at iba pa. Ang kabuuang

produksyon nito ay 1.6 milyon bariles bawat araw.

Matagal nang pinaglalawayan ng US at mga alyado nitong imperyalista ang yamang langis ng Libya. Determinado silang higpitan ang kanilang kontrol sa lahat ng mayor na pinagkukunan ng langis at gas sa buong mundo. Dati nang kumukulo ang kanilang dugo sa gubyrno ni Gadhaffi at iba pang gubyrnong naggigiit ng pambansang kasarinlan at nagkakait sa mga imperyalista na monopolisahan ang langis.

Hayagang nagkukumahog ang US na agawin at pahigpitin ang kontrol nito sa mga yamang langis ng Libya, tulad ng nagawa na nito sa Iraq. Pinangungunahan ngayon ng US ang pagpapataw ng mga parusa sa Libya at pagbabantag gagamitan din ito ng agresyon at pagmamalupit tulad ng nangyari nang agawin ng US ang yamang langis ng Iraq.

Kabilang sa panggigipit na ginagawa ngayon kina

“Libya...,” sundan sa pahina 12



Mangangamkam ng lupa sa Cagayan, binarikadahan

NAGBARIKADA ang mahigit 500 mamamayan sa Mision River sa Sta. Teresita, Cagayan noong unang linggo ng Pebrero para harangan ang pagsarbey ng mga Taiwanese na pinamumunuan ng isang Mr. Lu sa naturang ilog. Nagmula ang mga nagbarikada sa mga baryo ng Isaca, Rebeca, Cabambanan Sur at Mision sa naturang bayan.

Tinututulan nila ang pag-angkin ni Lu sa 1,500-ektaryang lupain sa pagitan ng Barangay Rebeca at Barangay Isaca, kasama na ang magkabilang pampang ng Mision River. Naniningil pa siya sa mga kumukuha ng buhangin at bato sa naturang ilog.

Binantayan ng mga elemento ng 17th IB ang pagsasarbey ng mga Taiwanese sa Mision River, at sinaklaw ng kanilang operasyon ang panahon ng tigil-putukan noong Pebrero 15-21. Inilunsad ang operasyon sa Sityo Paribalat, Barangay Dungeg at Sityo Camandarinan, Barangay Aridaoen sa bayan ng Sta. Teresita at sa Barangay Villa Cielo sa bayan ng Buguey.

Protesta laban sa pagtaas ng matrikula, inilunsad

MATAGUMPAY na nakapaglunsad ng pambansang araw ng pagkilos ang mga kabataan at estudyante laban sa pagtaas ng matrikula at iba pang mga bayarin.

Libu-libong estudyante ang nagrali sa Mendiola sa Maynila noong Pebrero 28 at nanawagan na itigil na ang pagtaas ng matrikula. Pinamunuan ng mga progresibong organisasyon ang pagkilos na nilahukan ng mga estudyante mula sa iba't ibang pampubliko at pribadong kolehiyo at hayskul. Nagkaroon din ng sabay na pagkilos ang mga estudyante sa Ilocos Sur, Baguio, Pampanga, Laguna, Palawan, Iloilo, Tacloban, Cebu, Butuan, North Cotabato, Cotabato City, Davao at General Santos.

Ayon kay Vanessa Faye Bolibol, *secretary-general* ng National Union of Students in the Philippines (NUSP), umaabot sa 10-15% pagtaas ng matrikula ang balak singilin ng ilang paaralan. Inihalimbawa ni Bolibol ang Father Saturnino Urios University na nagtaas ng matrikula nang 10%; Baguio Central University, 12%; at University of Negros Occidental Recoletos, 14%. Maging ang mga State Universities and Colleges (SUC) ay may planong magtaas ng matrikula, tulad ng Pangasinan State University na magpapataw ng 16% pagtaas (P150 hanggang P175 bawat *unit*) at Don Honorio Ventura State University na magpapatupad ng 30% pagtaas (katumbas ng P130 hanggang P170 bawat *unit*). Mayroon ding pagtaas sa mga bayarin sa Eulogio "Amang" Rodriguez Institute of Science and Technology (EARIST) at University of the Philippines-Mindanao.

Samantala, nagsampa naman ng reklamo ang mga estudyante sa Commission on Higher Education (CHED) noong Marso 4 laban sa mga eskwelahang sapilitang naniningil ng mas mataas na matrikula at bayarin. Naghain naman ng panukalang batas si Kabataan Party Rep. Raymond Palatino para sa regulasyon ng matrikula at iba pang mga bayarin. Pakay din nitong palakasin ang kapangyarihan ng mga estudyante at magulang sa konsultasyon at pagpapahintulot sa anumang dagdag-bayarin sa mga paaralan.

"Libya...", mula pahina 11

Gadhaffi ang pagbabawal ng UN Security Council sa mga upisyal ng rehimen na magbyahe at maglipat ng mga ari-arian. Iniuutos na rin ng Britain ang pagkontrol sa \$32 bilyong halaga ng mga ari-arian ng Libya na nakalagak karamihan sa mga bangko sa London.

Samantala, tuluy-tuloy ang pagsugod ng mga rebeldeng Libyan mula sa silangang bahagi ng bansa patungong Tripoli, kabisera ng bansa, kung saan inatake ng mga raliyista ang mga istasyon ng pulis at istasyon ng radyo ng estado at sinunog ang

mga upisina ng gubyrno. Nakontrol nila ang mga bayan at lunsod sa silangang bahagi ng bansa kung saan nakakonsentra ang 80% ng langis at imprastruktura sa pagkuha nito. Noong Marso 1 ay nakontrol nila ang isa sa mga kinikilalang balwarte ni Gadhaffi sa bandang kanluran ng Tripoli, ang syudad ng Zyawiya, bukod pa sa mga karatig-bayan. Sa mga lugar na kontrolado na nila ay nagbubuo sila ng pansamantalang konseho.

Tulad ng nangyayari sa iba pang bansa sa Middle East at North Africa, inaareglo na ngayon ng imperyalismong US at iba

pang alyado nito ang pagpapauupo ng isang papet na magbibihis-demokrata at mangunguna sa pagbubuo ng bagong konstitusyon, paglulunsad ng pana-panahong eleksyon at pagtatakda ng mga hangganan sa mga termino ng mga halal na upisyal.

Ang pag-aalsang masang ito ay kailangang samantalain ng mga rebolusyonaryong pwersa upang itayo o palakasin ang mga rebolusyonaryong partido, organisasyong masa at alyansa para sa patuloy na pagsusulong ng adhikain ng mamamayan para sa pambansa at panlipunang paglaya. AB



ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XLII Blg. 5
Marso 7, 2011
www.philippinerevolution.net

Editorial

Patuloy ang pakikibaka para sa katarungan ng mga biktima ng diktadurang Marcos

Kulang na kulang at lubhang huli ang igina-wad na bayad-pinsala sa 7,526 na biktima ng pasistang diktadurang Marcos. Nitong Marso 1, sinimulang ibahagi sa kanila ang halagang \$7.5 milyon na katumbas ng mahigit ₱40,000 lamang bawat isa. Bagamat tinatanggap nila ang maliit na halaga bilang danyos, hindi pa rin sila lubos na nalulugod. Patuloy ang pagkauhaw nila para sa tunay na katarungan.


Hindi sila lubusang nasiyahan sa ginawang pagkatawan sa kanila ng abugadong si Robert Swift. Mahigit 2,000 sa orihinal na 9,539 na nagsampa ng kaso sa korte sa US noong 1988 ang inalalis sa listahan batay sa bagong itinakdang "rekisito" ni Swift. Marami sa kanila ang tumungo sa Maynila at nadismaya nang malamang sila ay tinanggal sa listahan.

Kalakhan ng mga biktima ng pasistang diktadura ay nagkakaedad na. Marami ang namatay na. Dalawampu't limang taon na ang nakalilipas mula nang maibagsak ang diktadurang Marcos. Noon pang 1992 nagtagumpay ang mga biktima sa isinampa nilang kaso sa Hawaii Federal District Court kung saan napatunayan na may sala ang rehimeng Marcos sa malalalang paglabag sa karapatang-tao. Malaking inhustisya ang labis-labis na pagkaantalang isakatuparan ang bayad-pinsala sa mga biktima at pagpa-

pabaya sa mga Marcos at kanilang kroni na patuloy na mamayagpag sa kapangyarihan.

Kulang na kulang ang kabuuang inareglong halagang \$7.5 milyon na piaghatian ng libu-libong biktima ni Marcos. Napakaliit nito kumpara sa tindi ng kalupitang dinanas nila sa ilalim ng pasistang rehimen. Pero higit dito, napakaliit nito bilang parusa sa pasistang diktador na nagkamal ng napakalaking yaman at nagpakasasa sa kapangyarihan. Kulang pa sa isang porsyento ito ng itinakdang \$1.97 bilyong bayad-pinsala ng korte sa US. Para sa mga Marcos at kanilang

mga alipures, barya lamang ito na animo'y isinaboy nila para patahimikin ang patuloy na sigaw para sa katarungan.



**Mga tampok sa
isyung ito...**

**Pagbubukas ng
usapang pangkapaya-
paan PAHINA 3**

**Mga aktibista ng KMP
at BM, pinaslang
PAHINA 6**

**Kaguluhan sa Libya,
sinasagpang ng US
PAHINA 11**

Mga tuntunin sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa *angbayan@yahoo.com*